

ARLeF: furlan lenghe di dongje e di lontan a vicino/lontano 2018

Dentri de manifestazion, cuatri i apontaments promovûts de ARLeF, e tra chescj un incuintri cun ospite di ecezion Eugenia Natsoulidou, ativiste de minorance macedone in Grece

E je di gnûf in vore ancje chest an la colaborazion tra la ARLeF (Agenzie Regionâl pe Lenghe Furlane) e il festival vicino/lontano. A vierzi il calendari dai apontaments - **vinars ai 11 di Mai, aes 19.00**, tal Oratori dal Crist di Udin (plaçâl dal Ospedâl Vieri 10/2) - al sarà l'incuintri **Vietato parlare: lingue proibite, emigrazione, plurilinguismo**, cu la presince di Eugenia Natsoulidou*, ativiste de minorance macedone in Grece e presidente dal Moviment Educatîf e Culturâl Macedon, insieme cun Filippo Salvatore e Carlo Puppo, moderâts dal diretôr de ARLeF William Cisilino.

Intune Europe che e met fra i siei valôrs costitutîfs il plurilinguism e il rispjet des diversitâts, magari cussì no a esistin ancjemò contescj là che cualchi lenghe minoritarie e je discriminade o fintremai improibide. Al è il câs, apont, de lenghe macedone fevelade in Grece. Partint di chest contest, l'incuintri al sarà la ocasion par rifleti su diversis situasions di disavualance e di conflit linguistic in Europe.

Simpri inte zornade di vinars ai 11, ma **aes 21.00**, tal Teatri San Giorgio, e je la volte invezit di **INT/ART Sintî locâl - Agjî globâl**, cu la presentazion e il dibatiment su la seconde serie di documentaris monografics che a mostrin il ferment culturâl in Friûl e la creativitât in lenghe furlane tes arts visivis. A saran presints il regist Dorino Minigutti e l'autôr Giorgio Cantoni, insieme ae ARLeF, ae atore Aida Talliente e ai artiscj protagoniscj: il scultôr Edi Carrer, la fotografe Alice Durigatto, la ilustradore Carin Marzaro, l'artist visîf Michele Bazzana e Luca Malisan, fumetist. Al modere Paolo Cantarutti.

Ai plui piçui a son dedicâts invezit i doi apontaments cun leturis animadis e premis. **Sabide ai 12 di Mai, aes 16.30**, te Librarie La Pecora Nera, in vie Glemone, e sarà presentade in anteprime la novitât editoriâl **Benrivâts tal marimont**, publicade di Futura Soc. Coop. E je la storie de nassite e de esperience di amôr tant grande che e acompagne ducj i gjenitôrs cuant che al rive un frut. Protagonist al è un parussulin, un ucielut piçul, taront e colorât, che cu la compagne al fâs sù un nît di lane e di plumis, in spiete dai piçui che a rivaran. A intervignaran la autore Lussia Di Uanis, e la ilustradore Giulia Spanghero, insieme a Francesca Benvenuto de cjase editore, e a Erika Adami pe ARLeF.

Domenie ai 13 di Mai, te Libreria Moderna (vie Cavour), **aes 11.00**, l'apontament al è invezit cun **FAMEIS Storiis diversis e plenis di amôr**, golaine di libris ilustrâts che e conte cun ligrie e grande delicatece i diviers mûts di jessi famee vuê inte societât contemporanie, e che e je publicade de Kappa Vu. Insieme ae ARLeF, a saran presintis Francesca Gregoricchio, Alessandra Kersevan e la professore Silvana Schiavi Fachin.

Il program complet dai events ARLeF si pues consultâ sui sîts www.arlef.it e www.vicinolontano.it

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**

Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<

***CUI CHE E JE EUGENIA NATSOULIDOU, ATIVISTE DE MINORANCE MACEDONE IN GRECIE E OSPITE DI ECEZION DE ARLEF**

Eugenia Natsoulidou e je impegnade di simpri inte difese de minorance etniche e linguistiche dai Macedons, minorance culturâl che, dopo de fin dal Imperi Otoman, e je stade dividude tra Grece, Serbie e Bulgarie.

E à fondât il Moviment Educatîf e Culturâl Macedon (membri associât dal NPLD – Rêt paneuropeane pe promozion de diversitât linguistiche), un grup che al promôf la lenghe macedone e la cussience culturâl midiant di conferencis, publicazions e altris ativitâts educativis, marcant la sioire ereditât culturâl macedone de region, un territori che al è stât anetût de Grece, intal 1913. Intal 1922, centenârs di miârs di cristians grecofons a son stâts trasferîts in Macedonie de Turchie, sot dal tratât di Losanna, intant che miârs di natîfs a son stâts esiliâts, sot de politiche statâl atuâl di gjenocidi culturâl.

Vuê, i dissidents dai Grêcs imigrâts de Turchie a son in prime linie intai partîts neonaziscj tant che Alba Dorata. Insieme ai radicâi predicjadôrs di odi dentri de Glesie greghe ortodosse, a son specializâts intes tatichis intimidatoriis cuintri de comunitât macedone de Grece setentrionâl (100.000 - 250.000 personis), cundut che tantis di chestis regions a mantegnin une maiorance di popolazion di etnie macedone. Eugenia Natsoulidou, insieme ai membris de organizazion, e je stade cjapade di smire di variis menacis su cualchi media e social media. Menacis che a àn puartât a diviersis azions legâls che, però, no àn vût nissun efiet. Ai 16 di Novembar dal 2017, la associazion “Moviment Educatîf e Culturâl Macedon di Edessa” e je stade disfate in maniere legâl dai propriis membris, par pôre dal piês.

«O speri, in dut câs, che la savietât e prevali – e dîs Natsoulidou - e che il popul Macedon al puedi vê un futûr di libertât, e che al puedi conservâ la culture sioire che i è stade lassade di tantis gjenerazions. E o speri ancje che la Europe e sedi chê che e rimedearà ai erôrs dal passât e che e fasi la sielte juste par un futûr di pês e di prosperitât par ducj i siei popui natîfs».

Udine, ai 5 di Mai dal 2018

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**

Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<